



Untuk Terbitan Media
11 Disember 2025

SIARAN MEDIA BERSAMA

PERKESO BAYAR FAEDAH LEBIH RM140 JUTA KEPADA PEKERJA ASING DAN WARIS, LEBIH 48,000 KES DILAPORKAN SEJAK 2019

KUALA LUMPUR: Mula berkuat kuasa pada 1 Januari 2019, lebih dua juta pekerja asing di Malaysia kini telah mencarum kepada Pertubuhan Keselamatan Sosial (PERKESO) menerusi LINDUNG Pekerja atau Akta Keselamatan Sosial Pekerja 1969 (Akta 4).

Berdasarkan statistik, sejak 2019 hingga Oktober 2025, lebih 48,000 kes melibatkan pekerja asing telah dilaporkan dan sepanjang tempoh tersebut, PERKESO telah melunaskan pembayaran faedah berjumlah lebih RM140 juta kepada pekerja dan tanggungan mereka.

Ketua Setiausaha Kementerian Sumber Manusia (KESUMA), Datuk Azman Mohd Yusof berkata, angka itu jelas menunjukkan perlindungan PERKESO bukan sekadar keperluan undang-undang, tetapi jaringan keselamatan sosial penting yang membantu pekerja asing dan keluarganya.

“Begitupun, masih terdapat majikan yang gagal mendaftarkan pekerja asing mereka atau membuat caruman untuk mereka, menyebabkan pekerja tidak menerima bantuan sewajarnya apabila kemalangan berlaku.

“Sebagai respons, menerusi Akta 4, PERKESO telah menjalankan penguatkuasaan tegas untuk mengenal pasti majikan yang gagal mendaftar dan mencarum pekerja asing mereka.

“Majikan yang disabitkan kesalahan boleh berdepan denda, hukuman penjara atau kedua-duanya sekali. Mesej kami adalah jelas, keselamatan sosial untuk pekerja asing adalah kewajipan undang-undang dan juga tanggungjawab moral,” katanya.

Beliau berkata demikian ketika berucap semasa menghadiri program “*A Shared Vision For Foreign Worker Social Security Protection In Malaysia Luncheon With PERKESO 2025*” di Kuala Lumpur pada Khamis.

Dalam program sama, Azman turut menyempurnakan pelancaran *MyPERKESO Induction Course*, sebuah modul pembelajaran digital komprehensif yang dibangunkan bagi meningkatkan kesedaran keselamatan sosial dalam kalangan pekerja asing di Malaysia.

Modul secara dalam talian yang dibangunkan melalui kerjasama strategik antara PERKESO dan CIDB Holdings Sdn Bhd itu bertujuan meningkatkan literasi berkaitan keselamatan sosial kepada pekerja asing sebelum mereka memulakan pekerjaan di Malaysia.

Modul tersebut akan memperkenalkan fungsi PERKESO, menjelaskan perlindungan di bawah Skim Bencana Pekerjaan dan Skim Keilatan, selain menyenaraikan faedah yang tersedia untuk pekerja asing dan menerangkan peraturan yang perlu dipatuhi majikan.

Turut hadir dalam majlis tersebut ialah Pengerusi Lembaga PERKESO, Dato' Sri Subahan Kamal, Pengerusi CIDB Holdings Sdn Bhd, Zainora Zainal, Ketua Pegawai Eksekutif Kumpulan PERKESO, Dato' Sri Dr Mohammed Azman Aziz Mohammed dan Ketua Pegawai Eksekutif CIDB Holdings Sdn Bhd, Supian Musa.

Majlis sama turut menyaksikan pemeteraian Memorandum Perjanjian (MoA), menandakan komitmen lebih kukuh antara kedua-dua organisasi untuk menjadikan pendidikan keselamatan sosial sebagai komponen utama ekosistem pekerja asing di Malaysia.

Sementara itu, Pengerusi CIDB Holdings Sdn Bhd, Zainora turut menzahirkan sokongan terhadap kepimpinan PERKESO dalam memajukan agenda perlindungan buruh negara.

“Sebagai pemain utama sektor pembinaan, organisasi itu menegaskan komitmennya untuk bekerjasama dalam inisiatif yang mempromosikan amalan buruh berstruktur, bertanggungjawab dan mampan.

“Menerusi *MyPERKESO Induction Course*, CIDB melihat ia sebagai platform pemudah cara penting untuk meningkatkan kesedaran dan perlindungan pekerja asing,” katanya.

##TAMAT##

Mengenai LINDUNG

LINDUNG ialah penjenamaan semula skim perlindungan keselamatan sosial PERKESO yang dilancarkan pada 22 Ogos 2025 sebagai langkah strategik memperkukuh peranan dalam melindungi rakyat. Pendekatan ini lebih segar, inklusif, mudah diingat dan berimpak tinggi bagi menyampaikan mesej perlindungan sosial secara meluas dan berkesan. Ia bertujuan memperluas capaian, meningkatkan kesedaran serta memperkukuh kepercayaan rakyat terhadap PERKESO sebagai pelindung utama keselamatan sosial. Di bawah penjenamaan ini, Akta 4 dikenali sebagai **LINDUNG PEKERJA**, Akta 800 sebagai **LINDUNG KERJAYA**, Akta 789 (SKSPS) sebagai **LINDUNG KENDIRI**, dan Akta 838 (SKSSR) sebagai **LINDUNG KASIH**. Maklumat lanjut di www.perkeso.gov.my.

Untuk pertanyaan media, sila hubungi

Iklil Fatihah Kamal Redzuan

+6019-3273193

fatihah.redzuan@perkeso.gov.my

Ridauddin Daud

+6019-3265772

ridauddin.daud@perkeso.gov.my

Nurulain Hamzah

nurulain@cidbh.com.my